

Siunnersuummut nassuiaatit

## Nassuiaatit nalinginnaasut

### 1. Aallaqqaasiut

Siunnersuut Inatsisartut Siulittaasoqarfiat oqaloqatigereerlugu paaseqatigereerlugu saqqummiunneqarpoq.

Nukingiussamik ajornartoormilulu inatsisiliornissaq pisariaqarluni inuiaqatigiinni pisoqalersinnaasoq, 2020-mi martsimi corona-p ajornartorsiortitsinerata nalaani pimoorussamik paasineqarpoq. Danmarkimi Folketingi aamma Savalimmiuni Lagtingi piffissap sivikitsuaqqat ingerlanerani katersuussinnaasut, Kalaallit Nunaata angissusaata, nunami sumiiffiit attaveqaasersuutillu Inatsisartut nukinginnartumik aggersarneqarnissaat ajornakusoortorujussuutippaat. Coronap tuniluutilersimanerata malitsigisaannik Nuup matuneqarnera aammalu Kalaallit Nunaanni timmisartuussinerup tamarmi unitsinneqarnera, coronap ajornartorsiortitsinerata nalaani aamma immikkut akimmisaartitsivoq.

2020-mi martsimi inatsimmik nukingiussamik suliaqarnissaq akuersissuteqarnissarlu pisariaqarluinnarluni pisoqarnera, Inatsisartunut ilaasortat Nuummiittut kisimik aggersarneqarlutik, tamatumalu kingorna Inatsisartut aalajangiisinnaassuseqalernissaannut Inatsisartut sinniisussanik aamma Nuummiittunik ilassuserneqarlutik, aaqqiivigineqarpoq. Kisianni inuiaqatigiinni inatsisit nukingiussassat ajornartoormullu tunngasut Inatsisartuni nalinginnaasumik ilaasortaasunit allaanerusunit akuerineqarlutik, taamatut ajornartoormi aaqqiineq oqartussaaqatigiinnermut tulluannngilaq.

Inatsisartut taamatut elektroniskimik nukinginnartumik ataatsimiissinnaasimanninnerannut pissutaasoq tassaavoq, Inatsisartut Naalakkersuisullu pillugit Inatsisartut inatsisaanni § 8-mut nassuiaatini immikkoortuni, Inatsisartut qaqugukkut aalajangiisinnaassuseqarnerannik maleruagassiiviusumi, allassimasoq:

*“Aalajangersagaq taanna oqaatsitigut allannortitsineq aqqutigalugu manna tikillugu § 29-mik ingerlatitseqqinneruvoq, Inatsisartut aalajangiisinnaassuseqassappata ilaasortat ikinnerpaamik affaat najuutissasut, imatut paasillugu Inatsisartut ataatsimiittarfianni najuutissasut. Piumasaqaat taanna saneqqunneqarsinnaanngilaq, taamaattumillu ajornartorsiulernermi ajunaarnersuaqarneraniluunniit assersuutigalugu angallannerup isasoofigisimasaani aamma atuulluni.”*

Coronap ajornartoortitsinerata takutippaa Inatsisartut ataatsimiittarfianni nammineq najuunnissaq pillugu saneqqunneqarsinnaanngitsumik piumasaqaateqarneq tamatigut attanneqarsinnaanngitsoq. Taamaattumik Inatsisartut suliaq kinguartinneqarsinnaanngitsoq

naliliippata, Inatsisartut elektroniskimik ataatsimiissinnaanerit siunnersuummi matumani ammaanqarpoq.

## **2. Siunnersuummi immikkoortut pingaernerit**

Suliaq kinguartinneqarsinnaanngitsoq Inatsisartut Siulittaasoqarfiat naliliippat, Inatsisartut elektroniskimik ataatsimiissinnaanerit siunnersuummi ajornarunnaarsinneqarpoq. Tamanna ullumikkut ajornarpoq.

Siunnersuutip atuutilernerani Inatsisartut Suleriaasianni § 45-mi sunniutaasumik allangortitsisoqassaaq. Tamatuma saniatigut elektroniskimik ataatsimiittarnernut tunngatillugu Inatsisartut Suleriaasianni suliaqarnermut isumannaallisaanermullu maleruagassanik erseqqinnerusunik aalajangersaanissaq pissusissamisuussaaq.

## **3. Pisortanut aningaasaqarnikkut allaffissornikkullu sunniutaasussat**

Siunnersuut pisortanut aningaasaqarnikkut sunniuteqarnerlussanngilaq, tassami siunnersuummi elektroniskimik ataatsimiinnerit ingerlanneqarnissaannut immikkut software-nik imaluunniit hardware-nik pisisoqarnissaa piumasaqaatigineqanngimmat. Paarlattuanik suliassat nukingiussassat ataasiakkaat taamaallaat aalajangiiffigineqarnissaannut Inatsisartunut ilaasortat angallanneqartussaanngimmata aammalu Nuummi unnuisarfinniitinneqartussaanngimmata, pisortat annertuunik sipaaruteqassapput.

Siunnersuut Inatsisartut Suleriaasiannik allangortitsineranut atatillugu annikinnerusunik allaffissornikkut sunniuteqassaaq.

## **4. Inuussutissarsiortunut aningaasaqarnikkut allaffissornikkullu sunniutaasussat**

Soqanngilaq.

## **5. Avatangiisinut, pinngortitamut inuillu peqqissusaannut sunniutaasussat**

Soqanngilaq.

## **6. Innuttaasunut sunniutaasussat**

Soqanngilaq.

## **7. Sunniutaasussat annertuut allat**

Soqanngilaq.

## **8. Oqartussanut kattuffinnullu il.il. tusarniaaneq**

Siunnersuut tamanut ammasumik tusarniaassutigineqanngilaq, tassami siunnersuummi Inatsisartut iluanni pissutsit taamaallaat maleruagassiivigineqarmata. Inatsisartut Naalakkersuisullu pillugit Inatsisartut inatsisaannut allannguutissatut siunnersuutit allat aamma tamanna tunngavilersuutigalugu tamanut ammasumik tusarniaassutigineqanngillat.

**Siunnersuummi aalajangersakkanut ataasiakkaanut nassuiaatit***§ 1-imut**Nr. 1*

Inatsisartut ataatsimiinnerisa elektroniskimik ingerlanneqartarnissaat aalajangersakkami ajornarunnaarsinneqarpoq. Tamanna ullumikkut ajornarpoq. Ataatsimiinnerit Inatsisartut ataatsimiittarfiani najuulluni ingerlanneqartarnissaat ullumikkut piumasaqaataavoq.

Aalajangiisinnaassuseqarnissaq, aggersaasarneq, piffissamut killigitat il.il. pillugit Inatsisartunut maleruagassat allat aalajangersakkami allanngortinneqanngillat.

**Ilanngussaq 1**

<b>Siunnersuut inatsimmut atuuttumut sanilliullugu</b>	
<i>Oqaasertai atuuttut</i>	<i>Siunnersuut</i>
	<b>§ 1</b>  Inatsisartut Naalakkersuisullu pillugit Inatsisartut inatsisaanni nr. 26, 18. november 2010-meersumi, Inatsisartut inatsisaanni nr. 12, 29. november 2013-meersumi, Inatsisartut inatsisaanni nr. 30, 9. december 2015-meersumi, Inatsisartut inatsisaanni nr. 2, 29. maj 2020-meersumi aamma Inatsisartut inatsisaanni nr. 4, 19. november 2021-meersumi allanngortinneqartumi, makkua allanngortinneqarput:
<p><b>§ 8.</b> Inatsisartut aalajangiisinnaassuseqarput ikinnerpaamik ilaasortat affaat najuuppata. Aalajangiisoqartarpoq aalajangiineq taasisunit ilaasortat najuuttut affaanit amerlanerusunit taparserneqarpat.</p>	<p><b>1.</b> § 8-mi imm. 2-tut ilanngunneqarpoq: “ <i>Imm. 2.</i> Inatsisartut suliaq kinguartinneqarsinnaanngitsoq naliliippata, Inatsisartut imm. 1 apeqqutaatinnagu elektroniskimik ataatsimiissinnaapput.”</p>
	<b>§ 2</b>  Inatsisartut inatsisaat una tamanut saqqummiunneqarnerata aqaguani atuutilissaaq.